

# UiTM teruskan penguasaan

Oleh SYED AHMAD  
ZULKARNAIN SYED ALI  
syed.zulkarnain@kos-  
mo.com.my

UNIVERSITI Teknologi Mara (UiTM) mengekalkan penguasaan pada temasya Sukan Majlis Sukan Universiti Malaysia (MASUM) Fasa II yang berakhir di kampus Universiti Sains Islam Malaysia (USIM) di Nilai, Negeri Sembilan semalam.

Temasya sukan yang bermula pada 23 Mei dan berakhir semalam, menyaksikan kontinjen UiTM berjaya meraih 18 pingat emas, tujuh perak dan sembilan gangsa.

Daripada lapan acara yang dipertandingkan sepanjang temasya itu, UiTM muncul johan keseluruhan bagi acara futsal lelaki dan wanita, pencak silat, bola baling lelaki dan wanita serta taekwondo.

Universiti Putra Malaysia (UPM) pula berada di kedudukan kedua dengan sembilan emas dan enam gangsa.

Tuan rumah, USIM pula mencipta kejutan



apabila berjaya menduduki tempat ketiga dengan kejayaan meraih tujuh pingat emas, tiga perak dan tiga gangsa.

Enam daripada tujuh pingat emas yang dimenangi oleh kontinjen USIM itu diperolehi dalam acara pencak silat.

Piala pusingan bagi setiap acara yang dipertandingkan itu disampaikan oleh Menteri Pengajian Tinggi,

Datuk Seri Mohamed Khaled Nordin pada majlis penutup di Stadium Tertutup Nilai.

Hadir sama ialah Naib Canselor USIM, Prof. Datuk Dr. Muhamad Muda, Pengerusi MASUM, Prof. Dr. Shahrudin Abd. Aziz dan Timbalan Ketua Setiausaha (Pengurusan) Kementerian Pengajian Tinggi, Datuk Omar Abd. Rahman.

Temasya sukan Masum Fasa I telah diadakan di Universiti Teknologi Mara (UiTM) kampus Arau Perlis pada 15 hingga 20 Mei lepas dan UiTM turut muncul juara keseluruhan.



MOHAMED KHALED (dua dari kanan) diperkenalkan kepada atlet pada majlis penutupan Sukan MASUM Fasa II di Stadium Tertutup Nilai semalam.